

ОИЛАВИЙ-ХУҚУҚИЙ ТАРТИБГА СОЛИШНИ ТАКОМИЛЛАШТИРИШНИНГ АЙРИМ МАСАЛАЛАРИ

З.А.Нуралиева
Судьялар Олий мактаби
Мустақил изланувчиси

АННОТАЦИЯ

Уибү мақолада оила ҳуқуқий муносабатларни, хусусан мулкий, шахсий номулкий ҳуқуқий муносабатларни фуқаролик ҳуқуқий тартибга солишини такомиллаштириши масаласи ўрганилган. Жумладан, фуқаролик фактларини қайд этиши, никоҳ, никоҳдан ажралиши, эр-хотин орасидаги мулкий ҳамда шахсий номулкий муносабатларни тартибга солишига оид амалдаги қонунчилик ва улар билан боғлиқ муаммолар тадқиқ қилиниб, уларни такомиллаштиришига оид ечимлар илгари сурилган.

Калит сўзлар: ижтимоий таъминот муассасалари, васийлик ва ҳомийлик органлари, ФҲДЁ, медиация.

ABSTRACT

This article examines the issue of improving the civil legal regulation of family legal relations, in particular property, personal non-property legal relations. In particular, the existing legislation and related problems related to registration of civil facts, marriage, divorce, and regulation of property and personal non-property relations between spouses were researched and solutions for their improvement were put forward.

Key words: social welfare institutions, guardianship and guardianship bodies, registry office, mediation.

КИРИШ

Оилани давлат томонидан қўллаб-қувватлаш, уларни ҳал томонлама жамиятнинг асосий бўғини сифатида барқарорлигини таъминлаш ҳар бир мамлакатнинг доимий эътиборда бўладиган устувор йўналишлардан бири саналади. Бинобарин, халқ оилалардан ташкил топар экан унинг барқарорлиги, оилаларнинг тинч ва тотувлиги мамлакатнинг ривожи ва истиқболини белгиловчи асосий омил ҳисобланади. Ҳозирда Ўзбекистонда оилалар барқарорлигини таъминлаш, эр-хотин ўртасидаги ажралишлар сонини камайтириш, оилани сақлаб қолиш имконини берадиган кўплаб ташкилий-ҳуқуқий, ижтимоий-сиёсий чоралар белгиланган ва бу борадаги ҳуқуқий асослар яратилган. Бироқ, шунга қарамасдан эр-хотин ўртасидаги ажралишлар

сони уларнинг ўсиб бориш динамикасини кўрсатади. Бу ҳолат айниқса, катта шаҳарларда юқори эканлиги қўзга ташланади. Шу боис эр-хотин ўртасидаги ажралишлар сонини камайтириш, оилаларнинг бутунлиги ва барқарорлиги сақлаб қолиш борасидаги ташкилий-хуқуқий механизмларни кучайтириш, бу борада амалга оширилаётган ислоҳотларни кучайтириш замон талабидир.

МУҲОКАМА ВА НАТИЖАЛАР

Бугунги кунда оилаларни моддий ва маънавий жиҳатдан қўллаб-қувватлаш, ёш оилаларга қўмаклашиш давлат ва нодавлат йўли билан амалга оширилмоқда. Айрим давлат органлари оилаларни моддий қўллаб-қувватлаш, уларга давлат томонидан моддий ёрдам беришни таъминлаш билан шуғулланса (масалан, ижтимоий таъминот муассасалари), бошқалари эр-хотиннинг хуқуқ ва мажбуриятларини амалга оширишга қўмаклашиш (ФХДЁ), болалар хукуклари таъминлаш (васийлик ва ҳомийлик органлари, ҳалқ таълими тузилмалари) фаолиятини амалга оширадилар. Оилаларни қўллаб-қувватлашда, оилавий низоларни ҳал этишга қўмаклашишда фуқаролар ўзини-ўзи бошқариш органларининг роли катта ҳисобланади. Шунга қарамасдан ушбу тизимни бугунги кунда тўлиқ ўзини оқляпти, деб бўлмайди. Бундан ташқари, давлат (унинг органлари тимсолида) ва оилаларнинг ўзаро боғлиқлиги ҳам ҳозирда етарли даражада эмас. Кўп ҳолларда оилалар, эр-хотинлар ёки оиланинг бошқа аъзолари ўз муаммоларини яшириш, уларни ошкор қилмасликка ҳаракат қилишади ёхуд давлат органларига нисбатан ишонч йўклиги сабабли уларга мурожаат қилишдан тийилишади. Бунинг натижасида кичик муаммоларнинг катталашиб кетишига ва оқибатда оилавий зиддиятлар ва низоларнинг вужудга келишига ҳамда эр-хотин ажралишига сабаб бўлади. Оилани мустаҳкамлаш ва ажралишлар сонини камайтиришнинг асосий омилларидан бири эса эр-хотин ўртасидаги ўзаро тушуниш ва муроса саналади. Бунда уларга қўмаклашиш, эр-хотинга руҳий-психологик маслаҳат бериш ва уларни жамиятнинг ҳар томонлама тўлақонли аъзосига айлантириш борасида жамоатчиликнинг ўрнини ошириш зарур бўлади.

Эр-хотин ўртасидаги ажралишларга асосан турли келишмовчиликлар, эр-хотиннинг бир-бирини тушунмаслиги ёки бошқа кўплаб ижтимоий-иктисодий омиллар сабаб бўлади. Оила сақлаб қолиш имкони бўлган ҳолларда ҳам қонунчиликнинг мукаммал эмаслиги, носамарали услублар ҳам эр-хотин ажралишларга сабаб бўлади. Ўзбекистон Республикасининг оила қонунчилиги, хусусан Оила кодекси асосан эр-хотин ва оила аъзолари ўртасидаги муайян турдаги муносабатларни хуқуқий тартибга солишини назарда тутади. Бироқ ОК оила Конституциянинг 63-моддасида белгиланганидек “оила жамиятнинг

асосий бўғинидир ҳамда жамият ва давлат муҳофазасида бўлиш ҳуқуқига эга”лиги нуқтаи назаридан эмас, субъектлар нуқтаи назаридан ижтимоий муносабатларни тартибга солишга хизмат қиласди. Албатта, бу ўринда ОҚда никоҳ муносабатларни сақлаб қолиш, ажралишларни камайтириш, имкон даражаси эр ва хотинни яраштиришга нормалар ҳам мавжуд. Бироқ ҳар қандай ҳолатда ҳам ОҚ оилани жамиятнинг асосий бўғини сифатида сақлаш ва барқарорлигини таъминлашни назарда тутмайди. Шу сабабли мазкур вазифани бажариш, оилани жамиятнинг асосий бўғини сифатидаги статуси ва мақомини белгилаш, оилалар барқарорлигини таъминлашга оид ҳуқуқий чоралар ва механизmlарни таъминлаш мақсадида Ўзбекистон Республикасининг “Оилани қўллаб-қувватлаш тўғрисида”ги Қонунини қабул қилиш мақсадга мувофиқдир. Айтиш лозимки, АҚШда 1988 йилда “Оилани қўллаб-қувватлаш акти” қабул қилинган бўлиб, унда болаларни қўллаб-қувватлаш, оилаларни иш билан таъминлаш ва уларни моддий қўллаб-қувватлаш, уларнинг муаммоларини ечишга қаратилган имтиёзли хизматлар келтирилган. Бир қатор давлатларда эса оилаларнинг моддий ҳолатидан келиб чиқиб солиқ ва коммунал тўловлар (Япония, Корея) бўйича имтиёзлар назарда тутилган¹.

Ўзбекистон Республикасининг “Оилани қўллаб-қувватлаш тўғрисида”ги Қонунини қабул қилиш мамлакатимизда оилалар барқарорлигини таъминлаш, ажралишлар сонини камайтириш ҳамда жамиятнинг асосий бўғини сифатида оилаларнинг ижтимоий ва ҳуқуқий мақомини аниқлаштириш каби ижтимоий, ташкилий ва ҳуқуқий вазифаларни бажаради.

Фарзандликка олиш, васийлик ва ҳомийлик институтини такомиллаштириш оилани мустаҳкамлашга хизмат қиласди. Фарзандликка олиш фарзанд кўра олмайдиган эр-хотин муаммоларни ҳал қилиш, ота-она қарамоғидан маҳрум бўлган болаларни тарбиялашга ёрдам беради, васийлик ва ҳомийлик эса, ота-она қарамоғидан маҳрум бўлган болаларни тарбиялаш билан бирга узрии сабабларга кўра ўз мажбуриятини вақтинчалик бажара олмайдиган ота-оналарнинг муаммоларини ҳал қилишга имкон беради². Шу боисдан қонунчиликда фарзандликка олиши рағбатлантириш чоралари кўпайтирилиши, оилавий сиёсатнинг мақсади эса фарзандликка олиш, васийлик ва ҳомийликнинг ижобий аҳамиятини шакллантиришдан иборат бўлиши лозим.

Фикримизча, оилани мустаҳкамлаш учун фотиха, унаштирув институтини жорий қилиш мақсадга мувофик. Чунки ушбу жараён никоҳ тузиш ҳақида

¹ Имомов Н. Оилани мустаҳкамлашнинг ҳуқуқий асосларини такомиллаштириш // “Оила барқарорлиги давлат ва жамият таракқиёти кафолатидир”. – Наманган: “Наманган” нашриёти, 2019. – 78 б.

² Бабажанова Д.И. Отa-она қaramoғidan maҳrум bўlган bolalarni жойлаштириш шакllarinинг oилавий-hуқуқий tarтиbga solinishi: юрид. fan. фалс. докт (PhD).дис. ... автореф. – Тошкент: 2020. – 12 б.

қарор қабул қилишни атрофлича ўйлаб кўришга имкон беради, шунингдек фотиҳа қилинган шахслардан бири никоҳ тузишни рад қилган ҳолларда мулкий низоларнинг олдини олади. Мазкур институт Германия, Грузия, Украина, Испания, Япония ва бошқа мамлакатларда мавжуд. Бунда фотиҳа қилинган шахслар сифатида никоҳ тузишга ариза берган шахслар тан олинади. Фотиҳа қилинганлик никоҳ тузиш мажбуриятини келтириб чиқармайди, бироқ кейинчалик никоҳ тузиш рад қилинган ҳолларда рад қилган тараф иккинчи тарафга никоҳ тузиш ва тўйни ўтказиш билан боғлиқ харажатларни қоплаб беради. Никоҳ тузишни рад қилиш бевосита номуносиб хулқ-атворда бўлиш, муҳим аҳамиятга эга бўлган ҳолатлар (касаллик, фарзанд мавжудлиги, судланганлик ва х.к.) яшириш билан боғлиқ бўлса, харажатлар қоплаб берилмайди.

Аксарият ҳолларда оила фуқаролик хуқуқининг мустақил субъекти сифатида тан олиниши мумкин (масалан, юридик шахс тузмасдан оилавий тадбиркорлик билан шуғулланиш ва х.к.). Шу сабабли Ўзбекистон Республикасининг Оила кодексида умумий қоида сифатида оила ва оилавий мулк тушунчаси мустаҳкамланиши зарур.

Кўп ҳолларда ажралишларга шахснинг оилавий муносабатлардан келиб чиқадиган хуқуқларини суиистеъмол қилишлари ҳам сабаб бўлади. Эр хотиннинг бир-бирига нисбатан оилавий муносабатлардан келиб чиқадиган хуқуқларни суиистеъмол қилинишига йўл қўйилмаслигига оид қоида эса амалдаги ОҚда ўз ифодасини топмаган. Бунда эр хотиннинг, шу жумладан бошқа оила аъзоларининг оила муносабатларидан келиб чиқадиган хуқуқ ва мажбуриятларини амалга оширишларида қонун хужжатларига риоя этишлари³, биргалиқда турмуш қуриш қоидаларини, ахлоқ-одоб тамойилларини хурмат қилишлари ва вижданан ва ҳалол ҳаракат қилишларига оид нормани ОҚга киритиш мақсадга мувофиқ. Шунингдек, оилавий муносабатлардан келиб чиқадиган хуқуқларни суиистеъмол қилишга йўл қўйилмаслиги, суиистеъмоллик билан ҳаракат қилинган суд томонидан бундай хуқуқлар ҳимоя этилмаслигига оид қоида ҳам ОҚда белгиланиши зарур.

Ўзбекистон Республикасининг “Медиация тўғрисида”ги Қонуни оилавий муносабатларга ҳам татбиқ этилиши мустаҳкамланган бўлса-да, Оила кодексида эр хотин ўртасида юзага келган низони медиатор воситасида ҳал қилиш механизми мавжуд эмас. Эр хотин судга никоҳдан ажратиш ҳақида даъво ариза билан мурожаат қилганда, суд агар тарафларга ярашиш учун муҳл ат берса, у ҳолда эр хотинни медиаторга мажбурий юбориши зарур. Ушбу

³ Oila huquqi. Darslik. Mualliflar jamoasi. – Toshkent: TDYU, 2017. – 78 b.

қоида Ўзбекистон Республикасининг Оила кодексида ўзининг қонуний ифодасини топиши зарур, чунки медиатор маҳалла хузуридаги яраштирув комиссиясидан фарқли равишда эр-хотин ўртасида юзага келган ҳолатга малакали, хуқукий баҳо беради ва улар ўртасидаги низони ҳал қилишга ёрдам беради⁴.

Бундан ташқари, бугунги қунда оила мустаҳкамлаш нуқтаи назаридан оила қонунчилигини такомиллаштириш борасида бир қатор таклиф ва тавсияларни билдириш мумкин. Жумладан:

1) Маълум, оила яшаш ва оила бўлиш кишининг энг эзгу мақсадлари ва хоҳиши истаклари билан боғлиқ. Шу сабабли ҳам ушбу хуқуқнинг қонунчиликда кафолатланиши шахсларнинг оила қуриш ва оилавий ҳаётга нисбатан истагини оширишга хизмат қиласи ҳамда оилаларни сақлаб қолиш ва уларнинг барқарорлигини таъминлашнинг кафолати бўлиб хизмат қиласи. Шу сабабли ОК З-моддасини учинчи-тўртинчи қисмларини “Ҳар бир шахс оила яшаш хуқуқига эга. Ҳар бир шахс ўзининг оилавий ҳаётига ҳурмат қилишларига талаб этиш ҳуқуқига эга” каби жумлалар билан тўлдириш мақсадга мувофиқ;

2) Оилавий муносабатларни шартномавий тартибга солиш келгусида оила сақлаш, эр-хотин ва ота-оналар ўртасида турли низолар вужудга келишининг олдини оладиган воситалардар бири ҳисобланади. Шу боис оилавий муносабатларни тартибга солишнинг шартномавий усулига оид умумий норманинг ОКнинг “Асосий қоидалар” бобига киритиш мақсадга мувофиқ. Бу ҳолат нафақат эр-хотин ўртасидаги муносабатларга, балки ота-она ва болалар ўртасидаги, яқин қариндошлар ўртасидаги муносабатларга ҳам татбиқ этилади.

Оила муносабатларни шартномавий бўйича тартибга солинишига оид бундай нормалар бир қатор мамлакатлар оида қонунчилигида белгиланган. Жумладан, Украина Оила кодексининг 9-моддаси айнан шундай номаланади (Регулирование семейных отношений по договоренности (договором) сторон).

Юқоридагилардан келиб чиқиб ОКга янги “7-1-модда. Оила муносабатларини томонларнинг келишуви (шартнома) бўйича тартибга солиниши” номли моддани киритиш ва уни қўйидаги таҳрирда белгилаш лозим:

Эр-хотин, боланинг ота-онаси, ота-оналар ва болалар, оиланинг бошқа аъзолари ва қариндошлар ўртасидаги ушбу Кодекс билан тартибга солинадиган муносабатлар, агар ушбу Кодекс, бошқа қонунлар ва жамиятнинг ахлоқий асослари талабларига зид келмаса, уларнинг ўзаро келишуви (шартнома) бўйича тартибга солиниши мумкин.

⁴ Масадиков Ш.М. Сущность медиации и проблемы ее правового регулирования в Республике Узбекистан: Автореф. дис. ... канд. юрид. наук. Ташкент. 2008. – 26 с.

Бир оила бўлиб яшаётган, шунингдек, тутинган қариндошлар бўлган шахсларга нисбатан ушбу Кодекс тегишли қоидалар белгиланмаган ҳолларда, ушбу шахслар ўзларининг оилавий (қариндошлиқ) муносабатларни ёзма шаклда тузадиган шартнома асосида тартибга солишлари мумкин. Мазкур шартнома агар ушбу Кодекси, бошқа қонун ҳужжатлари ва жамиятнинг ахлоқ талабларига зид келмаса бажарилиши мажбурийдир;

3) Бугунги кунда оилавий мажбуриятларни бажариш муаммоси оилавий муносабатлардаги энг асосий масалалардан бири саналади. Эр хотиннинг оилавий мажбуриятларни бажармасликлари оқибатида ажралишлари сони ортиқ бормоқда. Бунда амалдаги ОҚда оилавий мажбуриятларни бажармаганлин учун маҳус жавобгарлик чораларининг белгиланмаганлиги ҳам сабаб бўлмоқда. Шу боис ОҚда оилавий мажбуриятларни бажармаганлик ҳуқуқий жавобгарликни вужудга келтириши ҳақидаги норма киритилиши мақсадга мувофиқдир. Бундай норма Украина ОҚнинг 15-моддаси 4-қисмида оилавий мажбуриятларни бажармаслик жавобгарликни юзага келитириш мумкинлиги белгиланган. Шу боис ОҚнинг 10-моддасини қуйидаги таҳрирдаги учинчи қисм билан тўлдириш лозим бўлади: Оилавий мажбуриятларни бажармаслик ёки бажаришдан бўйин товлаш ушбу кодекси, бошқа қонун ҳужжатлари ва томонларнинг келишуви (шартнома)да белгиланган ҳуқуқий жавобгарликни вужудга келтиради;

4) Маълумки, ҳуқуқлар билан бирга қонуний манфаатларни ҳимоя қилиш муҳим аҳамиятга эга. Масалан, эр ёки хотиннинг оилани сақлаб қолиши қўпроқ ҳуқуқ эмас, қонуний манфаат ҳисобланади. Бундан ташқари, болалар тарбияси ва қариндошлиқ муносабатларида ҳам ўзига хос қонуний манфаат мавжуд. Шу боис ОҚ 11-моддасининг номланишига “манфаат” терминининг қўшилиши мақсадга мувофиқ.

Таъкидлаш лозимки, оилавий ҳуқуқларни ҳимоя қилиш фуқаролик ҳуқуқларини ҳимоя қилишдан фарқ қиласди. Шу сабабли оилавий ҳуқуқларни ҳимоя қилишнинг ўзига хос усуллари ОҚда белгиланиши лозим⁵. Масалан, ихтиёрий бажарилиши керак бўлган мажбуриятни бажармагандан буни мажбурий бажартириш, ҳуқуқий муносабатни тугатиш ёки бекор қилиш, оилавий ҳуқуқларни бузадиган ҳаракатларни олдини олиш усули муҳим амалий аҳамиятга эга бўлиши мумкин. Масалан, хотин эрининг қариндоши ёки бирор таниши оилавий муносабатни бузишини олдини олиш мақсадида судга мурожаат қилиши мумкин. Суднинг тегишли қарори билан эса шу шахсга

⁵ Цыбуленко З.И. Семейное законодательство России: состояние и перспективы развития // Вестник Саратовской государственной юридической академии · № 3 (110) · 2016. – С. 14.

нисбатан оилавий хуқуқларни бузмаслик мажбурияти юкланиши ва оила сақлаб қолишиш мумкин бўлади.

Фикримизча, амалдаги ОКнинг 11-моддаси номини “Оилавий хуқуқлар ва манфаатларни ҳимоя қилиш” деб номлаш ва уни қўйидаги таҳрирда баён этиш зарур:

Оилавий хуқуқлар ва манфаатларни ҳимоя қилиш суд томонидан фуқаролик суд ишларини юритиш қоидалари бўйича, ушбу Кодексда назарда тутилган ҳолларда эса, васийлик ва ҳомийлик органлари ёки бошқа давлат органлари томонидан амалга оширилади.

Оилавий хуқуқлар ва манфаатларни қўйидаги усуллар билан ҳимоя қилинади:

хуқуқий муносабатни белгилаш;

ихтиёрий бажарилмаган мажбуриятни мажбурий бажартиш;

хуқуқий муносабатни тугатиш; шунингдек уни бекор қилиш;

оилавий хуқуқларни бузадиган ҳаракатларнинг олдини олиш;

хуқуқ бузилишидан олдинги ҳолатни тиклаш;

моддий ва маънавий заарни қоплаш, агар бу ҳолат Оила кодекси ёки шартномада назарда тутилган бўлса;

хуқуқий муносабатни ўзгартириш;

давлат органининг ёки фуқароларнинг ўзини ўзи бошқариш органининг қонунга зид хужжатини суднинг қўлламаслиги.

Хулоса ўрнида айтганда, оила қонунчилигини оилани мустаҳкамлаш ва сақлаб қолиш нуқтаи назаридан такомиллаштириш, оилавий-хуқуқий таъсир чораларни аниқлаштириш, оилавий-хуқуқий муносабат иштирокчиларининг хуқуқ ва манфаатларини етарлича таъминлаш ҳамда оилавий мажбуриятларни қонунчилик даражасида белгилаш йўналишида амалга оширилиши лозим. Албатта, бунда оилавий-хуқуқий санкцияларни кучайтириш ҳамда оилавий-хуқуқий тартибга солишига оммавий-хуқуқий усулларини татбиқ этиш тенденциясини ривожлантириш истиқболлари ҳам ҳисобга олиниши зарур.

REFERENCES

1. Масадиков Ш.М. Сущность медиации и проблемы ее правового регулирования в Республике Узбекистан: Автореф. дис. ... канд. юрид. наук. Ташкент. 2008. – 26 с.
2. Цыбуленко З.И. Семейное законодательство России: состояние и перспективы развития // Вестник Саратовской государственной юридической академии · № 3 (110) · 2016. – С. 14.